

# *PONTŠO EA MESSIA*

 A re inamiseng lihlooho tsa rōna nakoana feela. Molimo o ratehang, ha re utloa sefela seo, “Jesu o haufi, tsohle li a khoneha,” lipelō tsa rōna li thabisoa ke ho tseba e le taba e fetisang sefela. Ke ’Nete. U teng mona. Morena, ke lumela U ne u le ka morao ho tabernakele hona joale feela, hape; ’mènyana eo o ne a nkile lesea leo, a kolobile, puleng; le monna e monyenyane eo ea bitsang moratuo oa hae, hole koana kokelong, a eshoa. Utloa lithapelo tsa rōna, Morena. Ho na le batho ba lutseng kerekeng letšeħare lohle, ho tloha ka hora ea botšeħela hoseng hona. Ba emetse ho bona Uena, Morena. Ba re utloile re bua kajeno re re U tsohile bafung. ’Me U sa le Jesu eo ea phelang bosiusing bona, ka morao ho lilemo tse sekete le makholo a robong. U sa ntse u le Jesu. ’Me re a rapela, Molimo, U tle u folise mokuli e mong le e mong ka pel’ɑ Sefahleho se Khethhehileng. Ho se be le motho ea kulang lipakeng tsa rōna hoba tšebeletso e tsoe. Re bontše feela, Morena, hore U teng mona.

<sup>2</sup> Re hopotse banna ba babeli hoseng hoo ha Paseka, ba nyahameng, ntle le pelaelo. Empa bongata bo nyahame mona bosiusing bona, ba kula ’me ha ba fole, lingaka li ba tetse. ’Me ha ba tsamaea tseleng ea bona, ho hlahile Moeti Ea buileng le bona, ho bua ka Mangolo, letsatsi lohle. ’Me nakong ea mantsiboea, hoba A ba kenyé phaposing le monyako o koetsoe, O entse ho hong. O e entse kamoo A e entseng pele ho thakhiso, ’me ba tsebile e le Morena ea tsohileng eo. O ile a ba nyamella. Ba matha ka potlako, ba ea bolella ba bang, “O tsohile bafung.”

<sup>3</sup> Molimo, re Mo rapela ho kena lipakeng tsa rōna bosiusing bona le ho etsa lintho tseo A li entseng pele A thakhisoa. Lilemo tse sekete le makholo a robong ha se letho ho Eèna; Ke oa Bosafeleng. ’Me ba bangata mona ba potlakele lapeng, ba bolelle mohatsa bona, monna oa bona, baratuoa ba bona, moahisani oa bona, “O a phela! O ipontšitse ’na bosiusing bona! O folisitse boloetse ba ka! Joale ke tlil’o phela.” Aba sena, Ntate. Re e kōpa ka Lebitso la Jesu. Amen. (Le ka lula fatše.)

<sup>4</sup> Ke masoabi ha ke chele lentsoe, empa esale ke bua molebe, ho kolobetsa; ka tšoaroa ke sefuba, le ho qala, e sa le ke khutlike tlase koana Florida le koana lihlekehlekeng. Ke tlameha ho tsamaea hoseng joale, ho ea California, lebaka le ka etsang khoeli e tletseng ea likópano. Ke kōpile Moena Neville ho mpuella bosiusing bona, ’me ke tiile hobane le utloile molaetsa o babatsehang. Re ile ra natefeloa ke tšebeletso ea hoseng hona ho tsoa ho Moena Neville. ’Me re tšepile Molimo o tla tsoelapele ho ba le eèna le kereke ena, a sa ntse a aloса mona.

<sup>5</sup> Joale ke sa tsoa kōpana le Billy kantle mane, 'me a mphathatsa lephakong, a re, "Ntate, batho ba eme mona, ba bang e sa le ba eme mona letšeheare lohle."

<sup>6</sup> Ke itse, "Be, ke thabetse litšebeletso tsa rōna ha li atamelā ho fela, le tle le se tšoanele ho ema." 'Me pula ea na. 'Me ha ke kena moahong, bathoana ba babeli ba ne ba tsoa koloing mono, ba tšoere lesea le kulang. Ba ne ba kolobile. A sa khone le ho kena monyako. Empa ruri joalokaha ke eme mona, Molimo o folisitse lesea leo nakong eona eo. Ke hantle. Kamoo A arabang thapelo!

<sup>7</sup> 'Me ka mora ho rera, 'me hoseng hona ke rerile ka litemana tse hlano: *Ho Phela, Ho Shoa, Ho Epeloa, Ho Tsoha, Ho Khutla.*

Ho pheleng, O nthatile. Lefung, A mpholosa.

Kepelong, O tlositse libe tsa ka.

Tsohong, A lokafatsa ka mehla.

Tsatsi le leng O tla khutla, oh, tsatsi le khanyang!

Re lutse, re shebeletse bosiung bona, re emetse ponahalo ea Hae.

<sup>8</sup> Hobaneng re qhobellane ka mona? Hobaneng batho ba tlela ho utloa Evangeli? Koana, ka ho nyatseha ha Eona, Ke khulo e khōlōhali eo lefatše le kileng la e bona. Jesu o itse, "Ha Nka phahamisoa, Ke tla hulela batho bohle ho 'Na." Joale taba ke ena, ke borapeli bona boo re buang ka bona, na bo nèpahetse? Na ke 'Nete? Haeba e le 'Nete, re ka lumela Lentsoe le leng le le leng leo Bibele e le boletseng. Haeba e se 'Nete, re se amane le eona ka letho, re tsoelepele ka libe tsa rōna feela; ho ja, ho noa, hoba hosane re se re ea shoa. Empa ke thabile haholo ho tseba hobane Sena seo re buang ka sona ke 'Nete! 'Me ke bona feela borapeli lefatšeng... Le joale, bo lutse boneng, koana ke bona feela borapeli lefatšeng boo Mothei a khonneng ho shoa le ho tsoha hape, 'me bosiung bona o a phela.

<sup>9</sup> Ke bone pampiri, pampiri ea motse tsatsi le leng, ba ne ba hlahisitse monna, oa Buddha, ea hlahileng. Bongata ba lōna le e bone pampiring. Ba hlahisitse monna e leng Buddha e monyenyané ea tsoetsoeng joaloka Buddha; ehlide, ha a etsa mehlolo, empa thuto ea hae le sohle se ne se tšoana le sa Buddha. Haeba Buddha a hlomme motho tšimong, oa bohata; Molimo o hlomme Moea o Halalelang tšimong, Moea oa mannete.

<sup>10</sup> Joale, re bua ka lintho tse babatsehang tsena, empa na e be e tla sebetsa? Na e be Khalalelo... Na e be Moea o Halalelang o tla tšoarela motho libe tsa hae? Na e be O tla folisa maloetse a hae? Ehlide, O tla etsa hoo. Ke Molimo, ka mehla. Joale, haeba re ka khona... Haeba Jesu a ka kena lipakeng tsa rōna le ho Ipaka, A phela, mona bosiung bona lipakeng tsa rōna, e mong le e mong oa rōna o tlameha ho lumela tšepiso e 'ngoe le e 'ngoe eo A e hlahisitseng Bibeleng.

<sup>11</sup> O teng mona ea eso kenele e 'ngoe ea litšebeletso tsa ka pele? A re boneng letsoho la hao, ea eso kenele kōpano pele. Shebang feela, e ka ba halofo ea letšoel!

<sup>12</sup> Ha ke mofolisi. Ha ke lumele—ha ke lumele motho ofe e ne e le mofolisi. Jesu Kreste ke Mofolisi.

<sup>13</sup> 'Me O boletse, mehleng ea Hae mona lefatšeng, ha thoe Molimo ke Mofolisi. Joale, mehleng ea Hae mona lefatšeng, ha A ipolela e le Mofolisi, empa O supisitse batho pontšo ea Hae ea Messia, 'me pontšo eo ea Messia e ne e le ho tseba lekunutu la pelô ea bona. Ba tsebang 'nete eo ba ba kae?

<sup>14</sup> Mohlang oo O boleletse Petrose, mohla a fihlileng ka pel'a Hae, lebitso la hae, lebitso la ntatae; Petrose a ba a lumela hakana, ka tumelo e kana, Jesu o bile a mo neha linotlolo tsa 'Muso, ha morao, le ho mo beha holim'a Kereke.

<sup>15</sup> Mohla Filipi a fumanang Nathanaele tlas'a sefate, a 'molella, "Tloo bone Eo ke mo fumaneng, Jesu oa Nazaretha, mora oa Josefa."

<sup>16</sup> 'Me molumeli ea thata eo o itse, "Na ntho e molemo e ka tsoa Nazaretha?"

<sup>17</sup> O mo arabile ka karabo e fetisang eo motho a ka e hlahisang. O itse, "Tloo u bone. U se ke ua e nyatsa. Tloo, u iponele e le uena."

<sup>18</sup> 'Me hang ha Filipi a nyoloha le Nathanaele, Jesu o itse ho eèna, "Bonang Moiseraele, eo ho seng mano ho eèna!"

O itse, "U ntsebella kae, Rabbi?"

O itse, "Pele Filipi a u bitsa, Ke u bone tlas'a sefate."

O itse, "U Mora oa Molimo, Morena oa Iseraele."

<sup>19</sup> O boleletse mosali selibeng se pelōng ea hae. Lintho tsena li Mo pakile e ne e le Messia. 'Me haeba Messia eo a tsohile bafung kajeno, 'me a hlaphisitse hlatsuo, a folisitse maloetse a rōna le ho tšoarela libe tsa rōna, O ne a ka etsa ho le hong feela e leng ho bontša pontšo eo hape, hore O sa ntse a phela ho phethisa tšepiso efe eo A e entseng, ke botle. Na e lōkile? [Phutheho e re, "Amen. Ke hantle."—Mohl.] A re lumeleng seo joale re sa rapela.

<sup>20</sup> Morena, batho ba lebeletse. Lentsoe le le leng le tsoang ho Uena le fetisa seo Moena Neville kapa seo nka se buang maphelong a mangata. Lentsoe le le leng feela. Joale, halofo ea letšoel lena ha eso bone likōpano pele. Morena Molimo, 'Mopi oa Maholimō le lefatše, romela Matla a Jesu Kreste phaposing ena, eo Ea tsohileng, Moea o Halalelang o tlileng ka Pentekosta, 'me A tlotsi batho hakana. Nke ke khone, esita le ka lentsoe le cheleng lena, ho inehela Moea oa Hae ka bottlalo, A tle a bue ka lentsoe le pshatlehileng lena leo ke Mo nehelang lona, ho sheba ka mahlo ana ao ke Mo nehelang ona, ho bontša lipono le lintho tse tlang ho supisa batho hobane O tsohile bafung. 'Me batho

bana ha ba bona seo, letšoelé lohle le hamarele tšepiso efe le efe eo A e entseng. Ha ba sitiloe, ba Mo hamarele bakeng sa tšoareló. Ha ba kula, ba tsebe hobane re folisoa ka maebla a Hae. Aba sena, Morena. Re e kōpa ka Lebitso la Jesu. Amen.

<sup>21</sup> Hona joale ho fihlile makhaolakhang a maholo. Mona ka pel'a batho ba makholo a mabeli kapa a mararo, e a nyatseha. Athe, u ema pel'a likete tse makholo a mahlano, halofo ea milione, ho etsahala ntho e tšoanang. Ke Molimo. Joale ba ba kae ba kulang ka mona 'me ba batla ho rapelloa, phahamisa letsoho la hao. Ua bona, e ka ba halofo ea lōna, kapa ho feta. Nka sitoa ho ba tlisa bohole mona. Ke a kholoa... Ke tla tlameha ho botsa Billy hape. Ho 'motsa haeba a ntšitse litlankana tsa thapelo. Joale, ana—ana o e entse? [Motho o re, "E."—Mohl.] Ke hantle. Ke hantle.

<sup>22</sup> Sontaha se fetileng kapa khetlo la ka la ho qetela mona, ba ne ba sa aba litlankana tsa thapelo, 'me ka botsa feela, "Batho ba eso kenele kōpano pele ba ba kae?" Ba bangata ba phahamisa letsoho, hore ha ba eso kenele kōpano. Eare ba sa eme ba phahamisitse matsoho a bona, Moea o Halalelang oa haola o ba bolella hore e ne e le bo mang le maloetse a bona, le se neng se etsahetse; le ho folisa batho ka botlalo hakana, ho fihlela mathopa le lintho li nyametse, ho fihlela lioporeishene li sa etsoa. Ba ba kae ba neng ba le teng mona 'me ba bone seo liveke tse 'maloa feela tse fetileng?

<sup>23</sup> Haeba a ntšitse litlankana tsa thapelo, re tla li bitsa. Hoo ho neha batho ba lehae, 'me e seng ba lehae; batho bao e sa le batho le ka kōpanong, batho esong ho khone; ho kena moleng oa thapelo. Re ka sitoa ho ba nyollela bohole mona hang. Re tla ba tlisa ka khutso e khonahalang.

<sup>24</sup> 'Me ke batla le tšepahale ho Molimo. Le tšepahale ho lōna. 'Me haeba Jesu Kreste a ka kena har'a rōna a sebetsa a ba a etsa hantle joalokaha A entse mehleng ea Hae mona lefatšeng, ho tsamaea Galelea, le tlameha ho Mo amohela mabapi le sohle seo le se hlakang. Ha le a tlameha ho nyolohela kalaneng mona. O hlompha tumelo. Ho tla ba le batho ba kulang ka tle mane letšoeleng, ba sa tšoarang le setlankana sa thapelo, ba tla fola leha ho le joalo. Ba kulang ba mpa ba sa tšoara setlankana sa thapelo ba ba kae? Phahamisa letsoho la hao. Be, ha ho a ntšoa litlankana tse kaalo tsa thapelo, ua bona. Ke hantle, le lumele feela. Le shebe nqa ena feela.

<sup>25</sup> E reng ke le bontše seo Jesu a se entseng mehleng ea Hae mona lefatšeng. Mosali, khetlo le leng, o tlide ho Eēna. 'Me ha a khona ho kenella bongata. A sa tšoara setlankana sa thapelo, empa a ama qola ea seaparo sa Hae, hoba o itse pelōng ea hae, "Ke a tseba Monna eo o bolela 'Nete. Ha nka ama qola ea seaparo sa Hae, ke tla phela." 'Me o amme qola ea seaparo sa Hae, le ho tsoa a kena har'a letšoelé le ka fetang lena hangata.

Jesu a retoloha, 'me a re, "Ke mang ea Nkamileng?"

<sup>26</sup> Petrose a Mo khalema, le ho re, "Horeng U ka botsa taba ee, athe bohle ba ntse ba leka ho U ama?"

O itse, "Empa Ke a lemoha hobane Ke ile ka lahleheloa ke matla."

<sup>27</sup> Lipono li a fokolisa. U ke ke ua khona, ho ea hole haholo le tsona. 'Me O itse, ho qamaka letšoelie ho fihlela A fumane mosali eo, le ho 'molella ka phallo ea hae ea mali, 'me tumelo ea hae e ne e mo phelisitse.

<sup>28</sup> Ba e lumelang ba ba kae? [Phutheho e re, "Amen."—Mohl.] Bibele e boletse, "Jesu Kreste kajeno ke Moprista e Moholo ea ka angoang ke maikutlo a mahlomola a rōna." Na ho joalo? ["Amen."] Be, haeba E ne e le Moprista e Moholo, 'me a ka angoa ke maikutlo a mahlomola a rōna, na A ke ke a etsisa seo A se entseng mohlang oo, haeba e sa le Eèna maobane, kajeno, le ka mehla?

<sup>29</sup> Ke moo lōna ba sa tšoarang setlankana sa thapelo, le shebe nqa ena, le re pelōng ea lōna, "Morena, ke lumela pelō ea ka eohle, 'me ke a lumela U tla mpholisa. 'Me a nke ke ame seaparo sa Hao. 'Me U bue ka Moena Branham le ho 'molella, joaloka ha U entse ho mosali, 'me ke tla lumela ho Uena." Na le ka tsepahala hakaalo, la lumela Molimo ka pelō eohle ea lōna?

<sup>30</sup> Billy Paul o boletse, o buile metsotso e 'maloa e fetileng, a eme mona, ha thoe le mphuthehetse monehelo oa lerato. Ke ne ke sa batla joalo. E ne e le . . . Empa, ke a le leboha, ka ho mokhoa o tšoanang. Ke o hloka leetong la ka la California. Ke tla o khethela Evangel.

<sup>31</sup> Menehelo e menyenyane eo le mphang eona, na le tseba se etsahalang ka eona? Ke ne ke etetse Puerto Rico le Jamaika liveke tse 'maloa tse fetileng, teng ba porotile meeaa e likete tse mashome a mane masiung a robong. E entsoe ke'ng? Karolo ea lōna ea leshome. Ha ke tloha, ramotse oa e . . . moahloli oa sehlekehleke o ile a ema, a re, "Re eteloa ke baboleli mona 'me ba phutha monehelo o moholo, ba qosa chelete e ngata. Empa," ho re, "ha Moena Branham a fihla, ha a kōpa le peni ea chelete, ha a eso re kōpe ho mo lefella litjeho tsa hotele. 'Me o itefeletse, ho kutla le ho tla." E entsoe ke'ng? Chelete ea lōna. Ke batla ho kholiseha hobane ke e sebelisa hantle. Ka hona, Setulong sa Kahlolo, mohla ke emang pel'a lōna le Molimo, ke tlameha ho arabela, e sebelitse hantle. Ke e amohetse ka bonna, ha feela ke khona ho tsamaea, ho etsa ka bokhoni ba ka bakeng sa khanya ea Hae.

<sup>32</sup> Joale re ke ke ra nyololla litlankana tsohle tsa thapelo hang, ka hona ke tla ba nyolla feela, ba 'maloa feela ka nako.

<sup>33</sup> Ke mang ea tšoereng setlankana sa thapelo sa nomoro ea 'ngoe? Na u ka phahamisa letsoho la hao ha u khona ho ema.

Motšeо koana ka morao, ke leleiti la 'mala. Theoha hantle ka tsela ena, leleiti. U ka theoha ua tla ema mona lehlakoreng la kalana. Joale ke mang ea tšoereng setlankana sa thapelo sa nomoro ea peli? Ha u sa khone ho ema, phahamisa letsoho la hao, setlankana sa thapelo sa nomoro ea peli. Leleiti la motho e mosoeu mona. Ke hantle, leleiti, nyoloha hantle u sale leleiti lena la 'mala holimō mona morao, hantle holimō mona. Joale ba fetisetse ka *mane*, Doc, hang ha sebaka se holimō mona se tlala.

<sup>34</sup> Setlankana sa thapelo, nomoro ea tharo, na u ka phahamisa letsoho la hao ha u khona. Lejentlelemane hantle mona, monghali. Nomoro ea 'ne, na u ka phahamisa letsoho la hao. Ke hantle, leleiti, hantle ka mona. Nomoro ea hlano, na u ka phahamisa letsoho la hao. Mothaka e mocha enoa hantle mona. Hakana, e mong le e mong oa bona ke moeti ho 'na. Nomoro ea tšeleta, na u ka phahamisa letsoho la hao, nomoro ea tšeleta. Na ke bitsitse nomoro ea hlano, nomoro ea hlano? Le nomoro ea tšeleta, le eëna ke moeti ho 'na. Nomoro ea supa, na u ka phahamisa letsoho la hao. Phahamisa letsoho la hao, ke mang ea tšoereng nomoro ea supa. Ke hantle, ke a lumela ke tseba mothaka eo. Ke—ke a lumela ke a mo tseba. Nomoro ea robeli, na u ka phahamisa letsoho la hao ha u khona. Leleiti ka mona. Ke hantle, nomoro ea robong. Ke hantle, leleiti. Nomoro ea leshome. Ke hantle, nomoro ea leshome, leleiti.

<sup>35</sup> Ho na le phoso nqa e 'ngoe. Nomoro ea monna enoa mona ke bo kae? Na motho a ka sheba, lōna liashara tloong koano le shebe. [Motho o re, "Ke mashorobeli 'ne."—Mohl.] Mashorobeli 'ne. Ke ne ke bitsa nomoro ea leshome lekhatheng leo, ke a u leboha, nomoro ea leshome. Empa re tla fihla ho uena leha ho le joalo. Ke hantle. Shebang, ke tseba nomoro ea hao joale. Ke mashorobeli 'ne, ana e ne e se eona, u re mashorobeli 'ne kapa ntho e kang eo? Ke hantle, u eme mono feela. U lumele feela. Ke a u bolella, haeba u sa sebelise setlankana seo, setlankana sa thapelo, sheba nqa ena u lumele Molimo, le ho bona haeba Molimo a tla araba thapelo ea hao. Ke hantle.

<sup>36</sup> Nomoro, na e ne e le leshome? Leshome-'ngoe. Ke hantle, leshome-peli. Joale, ha u sa khone ho ema, feela....Nomoro ea leshome-peli. Leshome-tharo, leshome-tharo, morao koana. Leshome-'ne, nomoro ea leshome-'ne, motšeо morao. Nomoro ea leshome-hlano.

<sup>37</sup> Ba li aba hohle. Bashanyana ba li abang, ba re feela, "Ke mang ea batlang setlankana sa thapelo, phahamisa letsoho la hao." Ba li nka 'me ba li tsoaka 'moho, ha ho mang ea tsebang na mang o fumana efe. 'Me ba li ntša ka mokhoa oo feela.

<sup>38</sup> Nomoro ea leshome-'ne. Nomoro ea leshome-hlano, ke mang ea tšoereng setlankana sa thapelo sa leshome-hlano, nomoro ea leshome-hlano? Nomoro ea leshome-tšeleta, motšeо koana ka morao. Nomoro ea leshome-supra. Joale, haeba nomoro ea

leshome-tšeleta e le ka mohahong kapa e eme ka ntle lipakeng tsa litulo, u ka potoloha ua tla. Nomoro... Ke masoabi, ha ke a bona letsoho la hao, khaitseli, la eona. Uena u leshome-tšeleta? Ke hantle... [Khaitseli o re, "Leshome-supā."—Mohl.] Leshome-supā. Leshome-robeli, leshome-robong, nomoro ea leshome-robong. Mashopeli, nomoro ea mashopeli, monna ea leng ka mona. Ke hantle. Ke hantle.

<sup>39</sup> Joale ke lumela re tsoela hantle mona re kena lipakeng tsa litulo mona joale, ka hona re tla... [Motho o re, "Ho lekane."—Mohl.] Ho thoeng? ["Ho lekane."] Ha joale ho lekane. Ke hantle. Be, shebang ka mona le lumele. Ke hantle.

A re boneng, haeba seletsi sa piano, ha sesane le ka noto e tlase, *Lumela Feela*, ka noto e tlase ruri feela.

<sup>40</sup> Batho ba bangata lipakeng tsa litulo mona ke baeti ho 'na. Ha ke le tsebe. Joale ba teng ka mona ba sa ntseng ba tšoere litlankana tsa thapelo, ba bang mohlomong ha ba na litlankana tsa thapelo. Mohlomong re ka biletsha ba bang moleng oa thapelo metsotsong e 'maloa feela, hang feela hoba re hlophise ba lipakeng tsa mola oa litulo.

<sup>41</sup> Ke kholoa lejantlelemane lane mona, Doc, o kena a tsoa morao mane, o ne a bitsitsoe, leshome-tšeleta kape supa-... leshome-tšeleta. Ke hantle, kena hantle mono u eme malulong a hao, monghali.

<sup>42</sup> Joale, haeba u sa bitsoa, taba eo ha e amane le eona ka letho, ua bona, sheba feela u lumele.

<sup>43</sup> [Motho o re, "Ho sa ntse ho haella *leshome le metso e mehlano*, hape."—Mohl.] Nomoro ea leshome le metso e mehlano e a haella. E ka ba motho ea sa khoneng ho ema. Ha u sa khone ho ema... Motho a shebe setlankana sa thapelo sa motho e mong, mohlomong o setholo 'me ha a utloe. Haeba ba le teng mona, leshome le metso e mehlano, u amohetsoe ho ema malulong a hao moleng. Haeba ba tsoile 'me ba tla khutla metsotsong e 'maloa, le ba kenyé moleng hang ha nomoro ea bona e bitsoa.

<sup>44</sup> Ha re theohela moleng mona, re tla bitsa ba bang, ha Moea o Halalelang o bonahala o sa tlotse moaho, batho, e le hore ba tle ba folisoe.

<sup>45</sup> Joale, ona ke motsotsa o hlokolosi, joale ke mohla ke buileng 'Nete kapa ke buile leshano. Joale ke mohla Jesu Kreste a pakiloeng a tsohile bafung, kapa ha A tsoha bafung. Ke mohla E leng oa maobane, kajeno, le ka mehla, kapa ha se Oa maobane, kajeno, le ka mehla. Joale O tlameha ho ipaka e le Mofolisi, kapa Eèna ha se Mofolisi. 'Me haeba motho ea batlang ho nka litulo tsa ka a le teng, ho rapella bakuli, u amohetsoe ho tla tla nka litulo tsa ka.

<sup>46</sup> Ba ba kae ba lōna ba moleng oa thapelo mona, ha le sheba mona, ba keneng moleng oa thapelo joale, ba sa ntsebeng, 'me

le tseba hoba ha ke le tsebe kapa le letho ka lōna, phahamisa letsoho la hao.

<sup>47</sup> Ka ntle koana letšoeleng, ba tsebang ke sa tsebe letho ka lōna, phahamisa letsoho la hao (koana u a kula) ka ntle har'a letšoele. Ua bona, ke moo.

<sup>48</sup> Joale ebe Molimo o tla etsang? Lengolo ke leo, Moea oa Molimo o teng mona, joale na e be e tla sebetsa? Haeba nka inehela Moea o Halalelang, e tla sebetsa. 'Me e ke ke ea ntšebeletsa ha u sa inehela Moea o Halalelang, "Hoba Jesu o sitiloe ho etsa mesebetsi e mengata motseng oa Habo ka Sebele, ka baka la ho se lumele ha bona."

<sup>49</sup> Joale le lumele ka pelō eohle ea lōna, le tšepahale ka bonneta boo le ka bo khonang. Le eme ka khutso, le lebeletse. Ha Moea o Halalelang a etsa taba, le nyakalle, le lumele.

<sup>50</sup> Joale, Morena, sohle seo re se tšoereng, sohle seo re leng sona . . . E sa le ba eme 'me meomo ea bona e a honyela, e sa le ba lutse ba khutsitse ho fihlela ba batlile ba akheha. Joale, Morena, ho ke ho tsebjoe hobane U Molimo. 'Me ke phuthile letšoelie lena 'moho, ka taelo ea Hao. 'Me ke eme mona, e se ho bonoa, kapa ha se ho leka ho iketsa ntho e khōlō kapa ntho e fapaneng, empa ke thomo eo ke e laetsoeng ke Lengeloi, 'me ea pakoa ke Lentsoe la Hao. Ho ke ho tsebjoe bosiusing bona hobane Ú Jesu Kreste, Mora oa Molimo, ea tsohileng bafung; 'me U phela ka Kerekeng ea Hao, ka ho batho ba Hao, ho phethisa le ho ntšeletsa bosebeletsi boo U kileng Ua bo rua mehleng ea 'mele oa nama. Aba sena, Morena. 'Me re tla U rorisa, ka Lebitso la Jesu Kreste. Amen.

<sup>51</sup> Joale Billy Paul o kae, na u ka mohahong? O tsamaile na? Kapa, motho e mong o tlameha ho tla koano ho nka litlankana tsena tsa thapelo, ua bona. Tloo, Moena . . . ? . . . Mosali eo o tšoere setlankana sa thapelo letsohong la hae. Se nehe monna eo feela, ua bona.

Le apare tšabo ea ruri joale.

<sup>52</sup> Joale leleiti lena mona, ho latèla tsebo ea ka, ke moeti ea tletseng ho 'na. 'Me malulo a phethehileng a Lengolo ke ana, batho babeli le lichaba tse peli tse fapaneng.

<sup>53</sup> Jesu o fihle selibeng khetlo le leng, ho Santa Johanne 4, le ho kōpana le mosali oa Samaria. 'Me O qoqile le eèna nakoana, ho fihlela A fumane bothata ba hae. 'Me O mo boleletse bothata ba hae. 'Me, hoba A etse, o e lemohile e le Messiah. Ba e tsebang ba ba kae? [Phutheho o re, "Amen."—Mohl.] Na le hopola moqoqo oa bona? O itse, "Mosali, Mphe metsi." O ne a etsa'ng? Ho holehana le moea oa hae.

<sup>54</sup> 'Me o itse, "Seliba se tebile, 'me ha U a tšoara letho ho khella. Ha se tšoanelo ho Uena, u le Mojuda, ho kōpa Basamaria tse joalo."

<sup>55</sup> O itse, “Empa holane u tsebile Eo u buang le eèna, u ka be u kôpile metsi ho ‘Na.”

<sup>56</sup> ’Me eaba moqoqo o tsoella ho fihlela A sibolotse bothata ba hae. Ba tsebang bothata ba hae ba ba kae? O ne a phela bohololeng. Eaba O re, “Ea lata monna oa hao le tle koano.”

O itse, “Ha ke na monna.”

<sup>57</sup> Ha thoe, “Ke hantle. U bile le ba bahlano, le eo u phelang le eèna joale ha se monna oa hao.”

<sup>58</sup> Joale utloang seo a se boletseng. O itse, “Monghali, ke a lemoha U Moporofeta. Re a tseba Messia mohla A tlileng O tla re bolela lintho tsena. Messia, pontšo ea Messia, O tla etsa sena mohla A tlang; hoba E ne e tla ba Molimo-Moporofeta, Moporofeta, eo Moshe a ‘moletseng.’ Ho re, “Re a tseba hobane Messia o tla etsa sena mohla A tlang, empa Uena u Mang?”

U itse, “Ke ‘Na ea ntseng a buisana le uena.”

<sup>59</sup> ’Me a mathela motseng a bolella batho, “Tloong, le bone Monna Ea mpoleletseng lintho tseo ke li entseng. Na enoa ha se Messia?”

<sup>60</sup> ’Me mona ho eme mosali oa Moethopia ho monna oa moAnglo-Saxon, khetlo la pele ba kôpana bophelong; seo re se bitsang mosali oa ‘mala, monna e mosoeu. Mohla potso eo e hhahisoang mono, ea khethollo, ka pel’ a Jesu, O ba tsebisitse ka potlako: ha ho phapang ea letho mebaleng ea batho. Bohle re tsoa sefateng se le seng, Adama le Eva. Ruri. Linaha tseo re phetseng ho tsona, li fetotse mebala ea rôna; e ne e sa amane le eona ka letho. Molimo o shoetse libopiloeng tsohle: motho e mosoeu, motho e motšo, motho e mosehla, motho e mosootho, motho e mofubelu, le bohle. Bohle ke libopiloeng tsa Molimo.

<sup>61</sup> Empa leleiti le emetse ntho e ‘ngoe mona. A ka tšoha e le molumeli, a ka tšoha e se eèna. A ka tšoha e le moetsalibe. A ka tšoha e le mohalaleli. A ka tšoha a kula, mohlomong ha a joalo. A ka tšoha a batla; maemo a lichelete. A tšoha a emetse motho o sele. Ha ke tsebe. Ha ke eso ‘mone, ‘me ha ke na mohopolo oa morero oa hae mona ho hang. ’Me leleiti leo le tseba seo. Na ho joalo, leleiti? [Khaitseli o re, “E, monghali.”—Mohl.] Haeba e le joalo, phahamisa letsaho la hao batho ba bone. Phahamisa letsaho la hao batho ba tle... Phahamisa letsaho la hao feela. Lena ke khetlo la rôna la ho qala re kopana. Joale ha Morena Jesu a rata...

<sup>62</sup> Haeba a kula, nke ke ka mo folisa joaloka ha nka sitoa ho le folisa. Empa hola—hola Jesu a le teng mona O be a ka sitoa ho mo folisa, hobane O e entse mohla A shoang Kalvari. Empa A ka etsa se seng ho paka hobane E sa le Jesu eo, ‘me haeba a ka e lumela, o tla fola. ’Me ka eona nako eo a folang ka eona, le lôna le ka fola, hape, haeba le ka e lumela. Na ho joalo? [Phutheho e

re, “Ke hantle.”—Mohl.] Joale, Morena a e abe. Ke emetse tlolo ea Moea o Halalelang, ehlile.

<sup>63</sup> ‘Me joale, ka Lebitso la Jesu Kreste, ke beha moea o mong le o mong ka mona tlas’ a taolo ea ka, bakeng sa khanya ea Molimo.

<sup>64</sup> Joale, leleiti, ke batla u nchebe nakoana feela. Ke batla u lumele ka pelō eohle ea hao. ‘Me ha ke na le mohopolo oa sepheo sa hao mona, na u mang, le letho. Empa Molimo o tseba tsohle ka uena. Empa ha Molimo o ka mpolella lebaka la hao mona, u tla lumela hore Jesu Kreste, Mora Molimo, o teng mona ho phethisa le ho itšoara ka mokhoa oa Hae mehleng ea Hae mona lefatšeng?

<sup>65</sup> Na letšoelie le tla lumela, ka khopolo e le ’ngoe? [Phutheho e re, “Amen.”—Mohl.]

<sup>66</sup> Joale ke rōna bana, tema e tekiloe. Re phahamisitse matsoho a rōna bobeli, ha re tsebane. Moea o Halalelang o ngotse Bibele, ha thoe lintho tsena li tla hlaha letsatsing lena, ho re Jesu o tsohile bafung ‘me lintho tsena li tla hlaha, bosebeletsi ba Hae bo tla ntšeletsoa, ‘me matsatsing ana a morao e tla hlaha hantle feela ka moo A e tsepisitseng. Joale na e lōkile?

<sup>67</sup> Leleiti, o tšohile, ehlile, o ntse a suha matsoho a hae ka ha a ikutloa ka mohlolo lekhatheng lena. Ha se ka hobane a eme pel’ a ka; ‘na ke moena oa hae, ha e ka ke ea mo arubetsa ka maikutlo ao. Empa o a—o utloa maikutlo a ntho e etsahalang. ‘Me na u bona setšoantšo mono se nang le Leseli holim’ a sona, khaitseli? Ke sona seo u arubetsang ka maikutlo ao. Ke Lengeloi la Morena, Le holim’ a hao hantle hona joale. ‘Me koano u tlie ho rapelloa ke ‘na, [Khaitseli o re, “E.”—Mohl.] ka bothata ba mokokotlo o u hlokofatsang. [“Ke hantle.”] Ke hantle, phahamisa letsoho la hao.

<sup>68</sup> Joale na le a lumela? [Phutheho e re, “Amen.”—Mohl.] Ua bona, ho tsebisa, lekunutu la pelō. Joaloka ha A boletse feela, “U na le banna ba bahlano.”

<sup>69</sup> Hona joale u re, baeti ba tlileng bocha, u ka re, “Moena Branham u e akantse.”

<sup>70</sup> A re boneng haeba E akantse na. Ke a lumela E u boletse u jeoa ke mokokotlo. E ne e le ’nete? [Khaitseli o re, “E.”—Mohl.] Ana e ne e le ’nete? [“E, monghali!”] ‘Me uena, u tsoa etsoa oporeishene, hape, ‘me u sa tsoa kokelong. ‘Me, hore u tsebe hobane ke mohlanka oa Molimo, mohatsao o lutse morao mane. [“E, monghali, ke hantle.”] ‘Me o na le mathata, le eēna. Ha nka u bolella bothata ba mohatsao, na u tla e lumela? [“E, monghali.”] U na le mathata lephakong la hae le ka mokokotlo oa hae. Na ho joalo? Phahamisa letsoho la hao. Ke tla u bolella taba e ’ngoe e sele. Ke bona mohlanka, mora oa hao, o lutse morao mane, le eēna. [“Ke hantle”] Hantle. ‘Me mora oa hao o laseloa ke lintho. [“E, monghali.”] Ke hantle. [“E, ke hantle. Ke a U leboha, Jesu.”] Mof. Stovall ke lebitso la hao. Ke lebitso la hao leo, Mof. Stovall.

[“E.”] E-ea hae, Jesu Kreste o arabile lithapelo tsa hao! U ka fuoa seo u se kōpileng, ka Lebitso la Jesu.

<sup>71</sup> Joale le lumele feela! Lōna bohole batho ba ’mala, lumelang ka pelō eohle ea lōna joale. Na le a lemoha Jesu Kreste, Mora Molimo, o tsohile bafung? Hore ke Moea oa Hae o u fang maikutlo ao.

<sup>72</sup> Joale mosali e mosoeu ke enoa. Ha ke mo tsebe, ha ke mo tsebe na ke mang, seo a leng sona, kapa—kapa sepheo sa hao mona. Haeba e le ’neta, phahamisa letsoho la hao. Joale na le a lumela? Ha Molimo o rata, a ka senola pelō ea hae, joaloka ha A etselitse mosali selibeng, joaloka ha A etselitse mosali oa ’mala, haeba A ka e phethisa batho ba basoeu ba tla e lumela ba ba kae? Mona, ’na le mosali enoa, re phahamisitse matsoho a rōna bobeli, ena ke kōpano ea rōna ea pele.

<sup>73</sup> Ke bua ho le hong, leleiti leo ha le tsoe tikolohong ena. U tlie u tsoa bochabela, u tsoile bophirimela u tla koano. Ke hantle. U tsoa Ohio, ’me motse oo e ne e le Dayton. Ke hantle. ’Me lebaka la hao mona, hobane u na le bofokoli. ’Me u jeoia ke linerefe, hoba ha u khone ho robala. U e jella sethethefatsi sa mofuta. Ba u bitsa “Dixie,” ke hantle, Mason. Ke hantle. Khutla, u tla robala joale, ho qala bosius bona ho ea pele. Jesu Kreste o a u phelisa. Tsamaea ka Lebitsos la Morena.

<sup>74</sup> Ha u ka lumela! Joale lōna ba ka ntle koana letšoeleng, tlolo ea Moea o Halalelang e sa le teng mona, le lumele, lōna ba se nang litlankana tsa thapelo.

<sup>75</sup> Ho ka thoeng ka leqheku la monna le neng le eme mona nakoana e fetileng, leo, le sa khone... le sa khone ho kena moleng, le tsoere nomoro e phoso, o ne a le kae? Uena, ema ka maoto a hao. Na u lumela Jesu Kreste e le Mora oa Molimo? Na u lumela hoba ke moporofeta oa Hae? [Moena o re, “E, monghali.”—Mohl.] Ke hantle. U na le bothata ka matšoafao a hao. Ke hantle. Bo u tlohetse joale, e-ea lapeng ’me o phele! Jesu o u bopetse letšoafao le letle, ua bona.

E bang le tumelo ho Molimo, le lumele. Molimo ke Molimo.

<sup>76</sup> U phela joang, monghali? Na u lumela Morena Jesu Kreste? [Moena o re, “Amen.”—Mohl.]

<sup>77</sup> Joale, monna o tlie ho Jesu khetlo le leng, ’me a tloha a ea pholosoa, a ea bolella motsoalle e mong, a mo tlisa. ’Me motsoalle eno... Ho mo bolella hoba e ne e le molumeli. ’Me a holloa ho utloa sena, a re, “E be U ntsebella kae?”

<sup>78</sup> O itsé, “Le pele Filipi a u bitsa, u le tlas’ a sefate, Ke u bone.” E ne e le limaele tse mashome a mararō ho pota thaba. Ka maoto, o nkile letsatsi ho khutla le ho kena moleng oa thapelo, ’me hoba a kene moleng oa thapelo.

<sup>79</sup> Na u lumela Jesu a ka mpolella bothata ba hao? Na u tla lumela ka pelō eohle ea hao? Na letšoelie le tla lumela ka pelō

eohle ea lona? [Phutheho e re, "Amen."—Mohl.] Mona ha a tlela eèna. O emetse motho e mong; 'me ke mosali, 'me o siriloe ke lefu, ke khaitseli ea hao. ["E, ke hantle."] Ka tsoanelo ha se ntho ea hao... Ke morali oa 'mè oa hao. ["Ke hantle."] 'Me ha a eo mona. O kokelong Tennessee. Le lona le tsoa mono. ["Ke hantle."] 'Me u a... Mosali o entsoe oporeishene, empa ha e a thusa letho. 'Me u mo emetse. Molimo o abe kopo ea hao. E-ea, 'me Molimo o folise mosali eo le ho mo phelisa, holim'a motheo oa tumelo ea monna enoa.

<sup>80</sup> Morena Molimo, re khalema diabolosi ea amohang mosali eo bophelo ba hae. 'Me a motho enoa, ea amanang le eèna, a phele hobane u tlie a mo ema sebaka. Jesu, U ile ua re emela Kalvari, 'me Ua re folisa. 'Me re a U lumela. A ho be joalo. Amen.

E-ea, u lumela joale, moena. U se ke ua nahana letho le sele.

<sup>81</sup> U phela joang? Ha re tsebane. Ke khetlo la rôna la pele re kôpana. (Joale le apare tšabo feela, le mamele le rapele.) Haeba re sa tsebane, 'me re le basele, e ka ba khetlo la pele re kôpana le ka mohla. [Khaitseli o re, "E."—Mohl.] Na ho joalo? Haeba e le khetlo la pele re kôpana, phahamisa letsoho la hao. Ha Molimo o ka ntšenolela bothata ba hao, u tla lumela hobane ke mohlanka oa Hae? ["E, ke u lumela joalo. U mohlanka oa Kreste."] Ke tla u bolella joale. Ha re eso kôpane pele, empa o moKentuckiane. Ke hantle. U tsoa tulong e bitsoang Somerset, Kentucky. ["E."] Ke hantle haholo. 'Na ke tsoa Burkesville, Kentucky. 'Me u jeoa ke bothata bo leng ka—bo leng maleng a mpa, karolo e tlase. ["E!"] Ke mathopa. Ke hantle. Ho lôkile, Jewel ["Oh!"], u ka khutla, Molimo a u nehe pholiso ea hao. ["Oh!"]

<sup>82</sup> Na u lumela ho Mora oa Molimo, Jesu ea tsohileng? [Khaitseli ea sa tsoa folisoa mathopa, o boela a hooletsa, "Oh!"—Mohl.] Ha u ka amohela! Le ka ipotsa lebaka leo leleiti le nyakallang. Le uena, u ka etsa joalo, ["Oh!"] holane u le lintsing tsa lefu. ["Ho bokoe Lebitso la Hae!"]

<sup>83</sup> Ha ke u tsebe. Empa ha ke... Ha ke sa fose, ke lumela u kolobelitsoe hoseng hona, hobane ke u bona u entse ntho e molemo. Empa, ho u tseba, ha ke u tsebe. U mpile ua kena letšeng feela, 'me e ne e le... o ile a—o ile a kolobetsoa. Empa na u seo lumela Jesu a ka ntšenolela mathata a hao? Na letšoele le lumela ka pelô eohle ea lona? Ke bona ho hlaha mosali lipakeng tsa ka le uena. U emetse mosali mona, 'me mosali o batla a le moholo ho uena. Khele, 'mè oa hao. Ha a eo mona. O tsoa Georgia. 'Me hlile o tšoeroe ke methapo. Molato oa eona, ke phethoho ea bophelo, menophose. 'Me u emetse 'mè oa hao. Ke 'nete. Be, o tla e hlola, a be a phele. Ikele, u ntse u lumela joale, e tla fela eohle. 'Molelle hore a khotiale.

<sup>84</sup> Molimo a u hlohonolofatse, mohlankana. E ba le tumelo. Lumela ka pelô eohle ea hao. Ha u ka lumela! Rapela.

<sup>85</sup> Ke a kholoa 'na le uena ha re tsebane. Molimo o a u tseba 'me O tseba le 'na. Empa na Molimo o ka ntšenolela bothata ba hao? Haeba O ka etsa hoo, na u tla Mo lumela?

<sup>86</sup> Batho ba tlang ho lumela ka mona ba ba kaee, le ho re, "Molimo, ke tla lumela ha ka U bolella monna eo"? [Phutheho e re, "E. Amen."—Mohl.]

<sup>87</sup> Nakoana feela. Leleiti le lutseng ka morao ho banana bana mona, ea nchebileng, o khathatsoa ke methapo ea varicose. 'Me o lutse mono, a ntse a rapella motho e mong. 'Me moea oa hae o amme Moprista e moholo, o hokane le Molimo. U ntse u rapella motsoalle oa hao, ea lemetseng kelello. 'Me ba lula e—e motseng, ke motsana, ke Corydon, Indiana. Ke hantle. Ha u ka lumela, u ka fumana seo u se kōpileng. Amen.

<sup>88</sup> U ile ua tšoaroa ke pelō; haufi le qetello ea tsela. E re ke u bolelle bo bong ba mathata a hao, le hona, ho tsuba lisakrete. Ema motsotso, moea oo o qhomme le khatheng leo. Ha a batle ho etsa joalo. Ke eona ntho e bakang bothata ba hao. Mona, ke mohlankana enoa ea lutseng hantle ka mona, o batla ho tlohelia lisakrete tseo, le eēna. Haeba a ka lumela ka pelō eohle ea hae, tloaelo ea lisikarete e tla tloha. Ha u ka lumela! Na u a e lumela? Ha u ka e lumela 'me ua nka khato eona eo, u ka fuoa tokoloho ea hao; le uena u ka khona. Ha u tsoe mona. U tsoa hole le mona, hape. U ka khutlela Owensboro joale, u ntse u rorisa Morena. E ba le tumelo ho Molimo.

<sup>89</sup> Ke a u tseba, empa ha ke tsebe bothata ba hao. Ha Morena a ka ntšenolela bothata ba hao, na u tla Mo lumela? Bothata ba mala a hao bo tla itokela. Ke hantle. E-ea lapeng 'me u thabe, lumela ka pelō eohle ea hao.

<sup>90</sup> Ha ke kholoe ke u tseba. Na ha re tsebane? [Khaitseli o re, "E."—Mohl.] Na u a lumela? Seo ke—ke u bolellang sona, 'nete, u tla tseba haeba e le 'nete kapa che. ["E."] Ke hantle, bothata ba pelō ea hao bo tla fela. ["Ke eona. Ke a u leboha."] E-ea lapeng 'me u phele.

<sup>91</sup> Ha ke u tsebe. [Khaitseli o re, "Che."—Mohl.] Empa Molimo o a u tseba. U a lumela ha nka u bolella bothata ba hao e ne e le bofe, le moo bo neng bo leng teng, u tla fola? Mokokotlong oa hao. E-ea lapeng joale, bo tla u lesa 'me u tla phela.

<sup>92</sup> U nahana hoba Molimo o ka folisa lethopa leo le ho le tlosa, ka ntle ho opororeishene? U etsa joalo? Phahamisa matsoho a hao ha u e lumela. E-ea hae 'me u e amohele, ka Lebitso la Morena Jesu. Lumela.

<sup>93</sup> Ho a makatsa, ha ke rialo, le uena u ne u jeoa ke eona ntho eo. [Khaitseli o re, "E, ke etsa joalo."—Mohl.] Lethopa. U utloile maikutlo a hlollang ha ke rialo, hoba meeaa e 'meli eo e qhomme, ka eona nako eo. E-ea, Jesu Kreste o a u phelisa. Lumela.

<sup>94</sup> U mohlankana, ho tšoaroa ke arthritis, empa na u lumela Jesu a tla u phelisa? Haeba u etsa joalo, tsoa, u ntse u lumela, 'me u phele.

<sup>95</sup> Ba lumelang ka pelō eohle ea bona ba ba kae? [Phutheho e re, "Amen."—Mohl.]

<sup>96</sup> Ho ka thoeng ha ke sa bue letho ho uena, haese ho u bolella hobane Molimo o u folisitse ha u ne u hlahka k'hona mono 'me u ile oa arubetsoa ke maikutlo a mohlolo, na u ka ntumela? E-ea lapeng, u phetse. Jesu Kreste o a u phelisa.

<sup>97</sup> U mosali e mocha ea tšoeroeng ke methapo. Na u lumela Molimo o tla folisa methapo eo a e tlose ho uena? E sa le u leka ho fumana sebaka sa ho qala. Ke eona hantle mona. E-ea joale, ka nyakallo, thabo. Ho felile, bakeng sa hao. Lumela ka pelō eohle ea hao.

<sup>98</sup> Maemo a hao a linerefe a hlahisa bothata ba mala. [Moena o re, "Ke hantle."—Mohl.] U folisitsoe ha u ne u ema morao mane, monghali. Lebaka leo ke ileng ka u emela ho fihla. E-ea, ja sophoro ea hao, u phele.

<sup>99</sup> Bothata ba maleiti, linerefe, pherekano. Ke hantle. E tla u tlohela joale. E-ea lapeng 'me u phele, ka Lebitso la Morena Jesu. E ba le tumelo feela.

<sup>100</sup> U na le pherekano ea botšeħali, ke hantle, bo a kolla. Popelo e thibana. Lumela, Jesu Kreste o tla u phelisa. E-ea lapeng, 'me u lumele ka pelō eohle ea hao.

<sup>101</sup> Joale, u jeoa ke maemo ea nyarosang, pelōng ea hao, ho thibana. U a lumela Jesu Kreste o tla u phelisa? [Khaitseli o re, "E."—Mohl.] Haeba u e lumela, tloha ka Lebitso la Morena, 'me u phele. E ba le tumelo ho Molimo.

<sup>102</sup> Ho lōkile, moena, u a lumela Jesu Kreste o a u phelisa, le uena? Theoha ka mola feela, u ntse u rorisa Morena.

<sup>103</sup> Ba lumelang Morena Jesu joale tlase mane joale ba ba kae? [Phutheho e re, "Amen."—Mohl.] O tseba eng le eng e . . .

<sup>104</sup> Mof. Nash, ke a u tseba, empa nke ke ka thusa letho ha Leseli leo le lopaletse holim'a hao. Ke a u tseba, empa u rapella motho e mong. Ke mothoana e monyenyan, ngoana feela, ha a lule mona. O lula tlase Tennessee. Hape, u ntse u rapella motoalle oa hao oa ngaka ea tšoeroeng ke pelō. [Khaitseli o re, "Oho Molimo!"—Mohl.] 'Me mohatsae o sa tsoa otloa ke setrouku se bobebe. ["Oho Molimo!"] Ke hantle. Lumela, 'me u ka phela.

<sup>105</sup> Ke mothoana leleiti le lutseng ntlheng ea setulo mane, o behile monoana molomong oa hae, e be u nahanañ, mothoana uena leleiti? U ile ua hlaseloa ke linerefe. U tšohile ho hlaseloa ke tse ling. Ke hantle. Haeba e le 'nete, phahamisa letsoho la hao, u ntse u hlakola likeleli mahlong a hao. U se ke ua tšoha, 'me ha li sa tla u tšoara.

<sup>106</sup> Leleiti le lutseng pel'a hao mono, u tšoeroe ke asthma, bothata ba bronchaele. Khaotsa ho tsuba, bo tla u tlohela.

<sup>107</sup> E ba le tumelo ho Molimo. Lumela ka pelō eohle ea hao. Ha u ka lumela, tsohle li ka etsoa!

<sup>108</sup> Leleiti ke lena le lutse ka morao ho leleiti lena mona. Ke tiile hobane u . . . Leleiti, nakoana feela, lebitso la hae ke Mof. Evans. O tsoa Kentucky, Louisville. Ke hantle. Ha ke u tsebe. U tseba hore ke 'neta. U na le bothata ba pelō, u na le bothata ka litsebe tsa hao. Ke hantle. Ha ho le joalo, phahamisa letsoho la hao. Khutlela Louisville, Jesu Kreste o a u phelisa.

<sup>109</sup> Ke phephetsa tumelo ea lōna, ka Lebitso la Jesu Kreste, ho e lumela. Mang le mang ea ka mona, e lumele ka pelō eohle ea hao! Motšeо koana ka morao, lōna ba emeng ka morao, le lumele. Ha le a tlameha ho fihla tulong e ikhethang. Koana ka lehlakoreng *lena*, le lumele! Ba hlokang pholiso morao mono ba ba kae? Phahamisang matsoho a lōna, le re, "Ke a lumela, Morena." E bang le tumelo!

<sup>110</sup> Morao ka lehlakoreng *lena* mona ho lutse, ke bona monna ea rapelang ka botšepehi, ponong, aeme mono, ke moreri, oeme pel'a sefala, 'me o rapella kekeletso . . . ho rapella kekeletso bosebeletsing ba hae. Ha ke eso 'mone bophelong ba ka. Empa ke sona seo u se rapellang, moena. U tla e fumana joale. Lumela ho Morena Jesu!

<sup>111</sup> Monna o lutse motšeо ka morao ho eèna mono, o na le bothata sephakeng sa hae, likotolana sephakeng sa hae. O boetse o . . . Ha u ka e lumela, monghali, u ka fuoa pholiso ea hao. Amen.

<sup>112</sup> Ka ntle *mona* feela ntlheng ea mola mona, oa bobeli, leleiti e leng motho e mocha o inamisitse hlooho, hantle ho ella motšeо, o lutse mono a rapela, ka bothata ba pululana ea nyooko. Ke eona, leleiti, u phahamisitse letsoho la hao, 'me ke a tseba u—ke uena ea neng a rapela. U fuoe pholiso ea hao lekhatheng leo.

<sup>113</sup> Ho ka thoeng ka eona, na le a lumela Jesu o tsohile bafung? [Phutheho e re, "Amen."—Mohl.] Na O teng mona joale? ["E!"] Le a Mo lumela na? ["Amen."] Haeba le ntumela, haeba ke le boleletse 'Nete ea Bibele, 'me Molimo o phethohile oa nétefatsa hobane ke le boleletse 'Nete, hoo ho bolela hore, ka ho phethahala hore, Morena Jesu o teng mona. Na ho joalo? ["Amen."]

<sup>114</sup> Ka hona etsang sena, etsang sena, le se belaele, beha motho ea pel'a hao letsoho. Ke til'o rapela hantle ho tsoa mona, 'me sehlopha sohle sa lōna se tla folisoa hona joale ha le ka e lumela. Na le tla e lumela? Beanang matsoho holimō, ke hona. Bohle ba lumelang hoba hona joale ba tla fola, e reng, "Amen." [Phutheho e re, "Amen!"—Mohl.] Joale lōna . . . Ke til'o etsa thapelo ena. Le e rapele, le ntšale morao.

<sup>115</sup> [Phutheho e phetha thapelo ena, e setse Moena Branham morao—Mohl.] Oho Morena, 'Mopi oa maholimō le lefatše, Moqali oa Bophelo bo sa feleng, Moabi oa neo e 'ngoe le e 'ngoe e molemo, ke a hloka, Morena, matla a Hao a folisang. 'Me ke U rapela ho mpha tumelo ho e amohela. Eo ke tsepiso ea Hao. Ke a lumela U Jesu ea tsamaileng mabopong a Galelea, ea utloisitsoeng bohloko tlas'a Ponse Pilato, ea shoeleng, ea tsohileng, ea nyolohetseng Holimō, a neha batho lineo, ka Moea o Halalelang. Ke a lumela Moea o Halalelang o teng mona ho ntšeletsa mosebetsi oo U entseng mohla U ne u le mona. Ke hamarela tsepiso eo. Ke amohela pholiso ea ka. Ke tsepisa ho phelela Uena le ho utloa Melao ea Hao, ho tsamaea Leseling. 'Me joale ke a lumela, hobane ke ipoletse maipolelo ana, hore ke folisitsoe ka maqeba a Hao.

<sup>116</sup> Le lule le khutsitse ruri. Joale le nahane feela, ao ke maipolelo a lōna, Molimo o kena ka ho lōna hona joale. Ho bululela Moea o Halalelang ka hare, ka tumelo, "Ke a lumela maemo a ka a ntse a folisoa. Ke a lumela maloetse a ka ohle a tlsooa." Hona joale u ka pel'a Sefahleho sa Molimo. Na ha u utloe Moea oo? Bulang lipelō tsa lōna, ea lōna—tumelo ea lōna. Moea o ntse o folisa batho hona joale hantle; ngoanana e monyenyanee ea lutseng mona feela, e mong o ka letsohong la ka le letona. Kalana eohle e bonahala e khantsitsoe ke Matla a Kreste ea tsohileng. O holim'a letsoele. O ka har'a batho. Joale, eo e ne e le thapelo ea lōna.

<sup>117</sup> Joale ke tlil'o rapela ke kōpa liabolosi oa pelaelo ho sutha ho lōna.

<sup>118</sup> Oho Morena Molimo, 'Mopi oa Maholimō le lefatše, utloa thapelo ea ka, Morena; ka potlako, Moea o Halalelang o sa le teng mona, pele batho ba timela.

<sup>119</sup> Ke khalema liabolosi. Jesu Kreste o u amohile tlholo, O e hapile Kalvari; O hlotse lefu, liabolosi, lihele, le lebitla, le ho tsoha hape ka letsatsi la boraro, le ho phela ka mehla le mehla. Tsoa mona, Satane, u sebopuoa se hlotsoeng. Tlohela batho bana, 'me ba fole, ka Lebitso la Morena Jesu Kreste.

<sup>120</sup> Bohle ba amohelang pholiso ea lōna, emang ka maoto a lōna hona joale. Ka Lebitso la Jesu Kreste, emang! Amen. Phahamisetsang matsoho a lōna ho Eèna, le Mo rorise. Batho ba le bang bao ke ba bonang ba sa ema, ho na le monna ea lutseng setulong sa bakuli, Gane Heelie. Ke tseba bothata ba hae, ke bothata ba pholio.

<sup>121</sup> Ntho e morao *mona* e tšoana le setulo sa bakuli. A re boneng. Ho na le bothata, leleiti le sephaka se seng. Na ho joalo? Na u a lumela hobane ke moporofeta oa Molimo? 'Na ke o sele ho uena. Nke ke ka u folisa. Empa na u lumela Molimo a ka mpolella bothata ba hao? [Khaietseli o re, "E."—Mohl.] Ha e ka etsa joalo, e ka u thusa na? U jeoa ke daebetese. Ke 'nene. Joale e lumele,

tloha u ee lapeng u phele, holim'a setulo sa bakuli. Ke phetho seo u tlamehang ho se etsa, ke ho lumela ho Morena Jesu Kreste, le ho folisoa!

<sup>122</sup> Phahamisang matsoho a lōna joale, le—le ho re, “Ke a U leboha, Morena, ho mpholisa. Ke a U rorisa, Morena, ho mpholisa. Molimo o molemo! Molimo o moholo! Molimo o theko e thata! Molimo ke oa 'netel! Molimo o teng mona! Moea o Halalelang o teng mona. Matla a Molimo a teng mona. ’Me joale ke lumela ka sohle se ahileng ka ho 'na, hore Jesu Kreste, Mora Molimo, o a mphelisa. Amen.”

<sup>123</sup> Motho mang mona ea ahloloang ke sebe, ’me u tseba libe tsa hao li sa kena tlas'a Mali, ’me hantle hona joale ka pel'a Sefahleho sa Molimo, Oona o tsebang mehopolo ea lōna, ’me ke Moea o Halalelang o mpolellang sena, na u ka rata ho Mo amohela joaloka Mopholosi oa hao, na u batla ho hopoloa thapelang? Phahamisa letsaho la hao, bohle ba leng ka mona. Molimo a u hlohonolofatse, le uena, le uena, le uena, le uena. Ke hantle. Morao mono, uena, le ka mona. Ehlile. Morao mona, Molimo a u hlohonolofatse, mora. Molimo a u hlohonolofatse ka mono. ’Me Molimo a u hlohonolofatse. Ke hantle.

<sup>124</sup> Ua bona, le ka mohla Moea o Halalelang ha o fose. Ha Moea o Halalelang o bolela... Ke ne ke itokisetsa ho fetisetsa tšebeletso ho Moena Neville, ka ha pholiso e fetile, empa Ntho e itse, “Ba hloka pholiso ea moea.” Ha u batla ho amohela Jesu joaloka Mopholosi oa hao, inamisa hlooho ea hao nakoana feela. A re hlahiseng thapelo.

<sup>125</sup> Moena Neville, ke chele lentsoe haholo, ako hlahise thapelo ena, na u tla etsa joalo. Ho lōkile.

<sup>126</sup> [Moena Neville o a rapela, “Ntate ea Maholimōng, ka Lebitso la Morena Jesu Kreste, Ea haotseng ka khanya e kana har'a rōna bosiung bona. Joaloka ha bana ba inamisa hlooho ea bona, ka tumelo bosiung bona, ho lumela hobane U khona ho ba lokolla, moea le 'mele. Pholosa ba lumelang joale ka tumelo ea pako. Molimo o ratehang, bona e be bosiu bo fapaneng ho bona. Hona joale ba fe takatso, Oho Molimo. ’Me ba fe joale, Oho Morena Jesu, takatso e khōlō eo e tsebang hore libe li tšoaretsoe. Pholosa e mong le e mong, Oho Molimo, ba inamisitseng lihlooho tsa bona ka ntle mono, ba kōpileng ’me ba thahasella thapelo. ’Me bao, ho tloha nakong ea joale ho ea pele, ba rere pelōng ea bona ho phelela Eo Ea ba shoetseng. Ka Lebitso la Jesu le bakeng sa Jesu re a rapela. Amen, hape amen. Ho bokoe Morena!”—Mohl.] 

*PONTŠO EA MESSIA* SST59-0329E  
(The Sign Of The Messiah)  
LETOTO LA MELAETS AEA PASEKA

Molaetsa ona ka Moena William Marrion Branham o reriloe sethatong ka Senyesemane Paseka Sontaha mantsiboea, Hlakubele 29, 1959, Branham Tabernakele, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)